



2017-imi Nunanut allanut tunngasutigut naalakkersuinikkut ingerlatsineq pillugu nassuiaat.
(Namminiilivinnermut, Nunanut Allanut Nunalerinermullu Naalakkersuisoq)

Demokraatini Naalakkersuisut qutsavigerusuppagut manna nassuiaat sukumiisoq pillugu.

Nunanut allanut politikkip pingaarutaa alligaluttuinnarpoq nunarsuarmi naalagaaffiit imminnut qalliertortillugit. Nunat tamalaat suleqatigiinnerat unitsissinnaangilarput aamma unitsikkusunnangilarput, taamaakkaluatoq isummersorfigisariaqarparput ajunnginnerpaanillu pissarsiaqarfiginiarsaralugu. Aamma tamatuma saniatigut allanut ajornartumik akuerisariaqarparput ataqisariaqarlugulu nunat tamalaat suleqatigiinnerujartorneranni killeqarfiit aporfissatut isigineqarneq ajormata.

Tamatumunnga assersuutaalluarsinnaavoq Naalakkersuisut neriunaateqanngilluinnartumik nunami maani imigassamut pilerisaarutinik inerteqquteqarniarsarinera. Sunniuteqarnaviangilaq internettimut iseraangatta imaluunniit nunat allamiut tv-kanaalii isiginnaaleraangatsigit killeqanngitsumik pilerisaarutinik takusassinneqartuutaratta. Aalajangersinnaangilarput nunani allani susoqassanersoq aamma isumaqalersitsiniarsarissanngilagut nunat tamalaat suleqatigiinnerujartornerat soqutigisariaqanngikkipput. Taamaaliorsinnaangilagummi.

Paarlattuanik nuannaarutiginiartigu nunat tamalaat suleqatigiinnerujartornerat teknologillu qanillattortimmatigut nunanut allanuinnaangitsoq aammali immitsinnut. Nunat allamiut kiffartuussissutaat Skype Facebookilu qujarunnikuuagut aamma ullut tamarluinnaasa atortarpagut assersuutigalugu qitornagut efterskolertut imaluunniit nunani allani ilinniartut attavigissatillugit. Aamma nunatsinni atorluaqaagut ajornannginnerujussuanngornikuuvormi ikinngutigut ilaquuttallu qanoq innersut aperiniarlugit allaffigilaartarnissaat.

Tamanna nuannerpoq aamma nunat tamalaat suleqatigiinneranni periarfissarpasuit misilerartariaqarpagut atorluarlugillu - nunatut aamma inuinnartut.

Aamma pingaartorujussuuvooq nunatut nunarsuup sinnerani paatsoorneqarsinnaasunik kalerriuteqartannginnisarpur. Allatut ajornartumik ataqisariaqarparput kikkut nunanut allanut politikkimut oqartussaansut. Taamaattumik tunngaviusumik inatsisitaarnissatsinnut ataatsimiititaliarsuatta siulittaasuata Nunanut allanut Naalakkersuisuusaarnera iluaqutaanngivippooq allaat oqaaseqarfigalugu Cataloniap naalagaaffinngorusulluni kaanngarniarnera. Taamaaliukuttoorsinnaavoq Siumumi ilaasortatut, kisianni iluaqutaanaviangilaq puussaarutigissagutsigu nunanut allanut tunngasunut kina oqartussaataitaneersoq. Tassunga atatillugu sannginnermik ersersitsineruvoq Naalakkersuisut Siulittaasuata erngerluinnarluni Tunngaviusumik Inatsisitaarnissamut Ataatsimiititaliarsuarmi siulittaasumik inissiinninnera paatsoorneqarsinnaanngitsumillu oqaluttuullugu suna suliassarineraa. Suli inortuisoqanngilaq



aamma Demokraatini sakkortuumik Naalakkersuisut Siulittaasuat kaammattussavarput taamaalioqqullugu.

Taamaakkaluartoq Demokraatini nuannaarutigaarput maani Inatsisartuni aalajangernikuugatsigu naalagaaffittut Islandimi aallartitaqarfimmik ammaaniarluta. Island eqqaamiutsinni qaninneraavoq aamma Island isumassarsiorfigikuttoorsinnaavarput minnerunngitsumik niuerneq takornariaqarnerlu pillugit, tassami Island ukiut kingulliit ingerlatsinerani iluatsitsinikuuvoq mikinngitsumik.

Nunami maani amerlanerusunik inuussutissarsiuteqartariaqarpugut soorlu Islandimisut aamma aallartitaqarfinggorumaartussaq atorluartariaqarparput Islandimik suleqateqarnerput sulii siuarsarnerujumallugu.

Uannut aamma pingaaruteqarpoq oqaatigissallugu nunanut allanut politikkimi iluatsitsineq maani angerlarsimaffitsinni aallartissammat. Maani inimi aalajangikkatta nunat allamiut uangutsinnik isiginneriaasiat sunnertarpaa aamma qularnanngilaq nunat allamiut uangutsinnut soqtiginninnerat sunnerneqarsinnaassasoq. Tassunga assersuutaalluarsinnaavoq 2013-mi Naalakkersuisut Siumumit siuttuuffigineqartut aatsitassarsiornermut tunngatillugu piunasaqaatinik allanngortitseriataarnerat atorussanngortillugillu royalties. Qularnanngilaq tamanna ajunnginnerpaamik eqqarsaateqarluni piliaasoq qularnaarumallugu Kalaallit Nunaata aatsitassanut isertitaasa sapinngisamik pitsaanerpaatinnissaat. Ajorluartumilli nunat allamiut taamatullu aningaasaliisartut nunat allamiut taamatoqqissaq iliuusaasoq isiginngilaat. Aalajangiineq kinguneqarnerlorujussuarpoq nunat allamiut nunatsinnut aningaasaleerusussusaannut aamma kingunipilui ulloq manna tikillugu malugisinnaavagut, aatsitassarsiorlut qaqiniapiloomata aamma aningaasaliisartut tunuarsimaartupilussuupput assersuutigalugu nunatsinni attaveqaatit pillugit suliaannut angisuunut pilersaarutit aningaasaliiffiginissaannut. Suliaq paatsuugassaannngitsumik takutippaa eqqarsaatigilluaqqissaartariaqartassagipput nunatta killeqarfiata iluani politikki pineqartillugu. Nunanut allanut politikkimik suliaqarnitsinni pissutsivut nunap killeqarfiata iluani politikkimik suliaqarnitsinnut sunniutilerujussuuvoq. Suut tamarmik ataqtigipput.

Naggataatigut Naalakkersuisut qinnuigerusuppakka Pituffik pillugu killiffimmik sukumiisumik nassuiaateqaqqullugit. Nunatut nunatta ilaa USA-mut attartortipparput aamma taamaattumik paarlattuanik piunasaqarsinnaasariaqarpugut. Kissaatigaara amerikamiut siunissami suleqatigiinnissaat pillugu isumaqatigiinniarnert ingerlarngata killiffia peqqissaartumik nassuiarneqassasoq. Pingaaruteqarpoq Inatsisartut suliami tassani qanimut malinnaatinneqarnissaat.

Pituffiullu eqqartornera iluatsillugu arlaqarput sukumiisumik nassuiarneqartariaqartut. Kiffartuussinissamut isumaqatigiissut amerikamiut suliffeqarfiutaannit Vectrus Servicesimit oktoberip aallaqqaataaniit tiguneqarpoq. Aallaqqaammulli neqerooruteqartuugaluarpoq ingerlatseqatigiiffik Exilis Services ajungaallunilu. Taamatut ineriartortoqarsimaneranut suna pissutaava? Aamma Naalakkersuisut pineqartumut tunngatillugu qanoq iliulersaarpat? Naalakkersuisut sulissutiginerlugu suliariumannittussarsiuussisoqaaqqinissaa? Aamma suliamut tunngatillugu Naalakkersuisut allanik paasissutissiissutissaqarnerlutik?

Naliginnaasumik isigalugu suliamut tunngatillugu Inatsisartunut innuttaasunullu Naalakkersuisut paasissutissiisarnerat mikisuararsuusimavoq. Soormita taamaattoqarpa? Suna Naalakkersuisut



matoqqalluinnarnerannut siunertaava?

Tassunga atatillugu Tului Nunaata Brexit pillugu isumaqatigiinniarnanun tunngatillugu EU-p uatsinnut paasissutissiisarnarata killiffia peqqissaartumik nassuiarneqassasoq qinnutigissuara. Isumaqatigiinniarnarit avammut nioqqutissiorfitta annerit ilaannut iserniarnitsinnut pingaarutilerujussuannorsinnaapput aamma taamaattumik pingaaruteqarluinnarpoq sapinngisamik annerpaamik ilisimatinneqartarnissarput.

Taavalu naggataatigut sukumiisumik nassuiaqussavara sooq Naalakkersuisut Arctic Circle pillugu ataatsimeersuarnermi peqataanginnissartik qinersimaneraat. Ataatsimeersuarnermi tassani Kalaallit Nunaat oqallisaangaatsiartarpoq taamatullu issittoq tamarmi. Nunanut Allanut Sillimaniarnermullu Ataatsimiititaliaq peqataasoq aamma Demokraatini eqqumiigaarput Naalakkersuisut peqataatitaqanginnerat. Tamanna pillugu nassuiaasoqarnissaanut qilanaarpunga.

Taamatut oqaaseqarlunga 2017-imi Nunanut allanut tunngasutigut naalakkersuinikkut ingerlatsineq pillugu nassuiaat tusaatissatut tiguara.